

Prins Roger 3e & Prinses Ilona, eine truukblik;

Gelökkig höbbe veer de foto's nog, want de periode van begin jannewari tot begin mièrt is omgevlaoge es- of veer in ein Vastelaovesraket zaote, 't sjpel begós in 2018 bie ós thoes op de bank wie ze ós kaome vraoge. Een paar gezellige aovende gehad mèt de president en zien adjudante oet de raod. Wie ze ós al belde mèt de vraog; "Maoge veer 'ns langskómme", keke veer twiè ós smilend aan en yes! In 't 6x11 jubileumjaor van de Beumerwalders! Wauw! Eine tied van veurbereiding brook aan, want veer wouwe neet veur verrassinge kómme te sjtaon. Wat uiteraard neet gelök is. Zoa vääöl leuke verrassinge op ós paad gekómme, ekere waek weer opnuuj, tot de sjeleeting van vastelaovend 2019 een feit waor.

Veer twiè heije ouch um ós heen gekeke en gefilezofeerd; wae geit mèt ós mèt veurop in de polonaise...? Noa Wolter sjting daobie op plaats 1 um jeugprinses te waere. Wie leuk zou dat zin...? Euver de Jeugprins heije veer nog gein idee. Enfin, mèt Oud & Nuuj ginge veer same op sjtap mèt Richard en Daisy Wolter. Gezellig mèt z'n veerkes, umdat de res van de "verkes" (kom ich later op truuk) allenei de agenda gevöld heije. Ós veurgenómme te zwiege, mer es hun d'r euver zouwe beginne, dan zouwe veer aanhaoke... En jawel hoor, 't woort eine aovend um noats te vergaete. De Jeugprins bleef echter 'n groate verrassing.

Ós oetreuping waor eine sjpannende daag. Gewoon wie ummer op de 1e zaoterdig van januari ging ich mèt Caecilia flesje langs de deur ophaole en Ilona loog krank op de bank. Aafgemeld veur de rippetjesje van de drumband zaoterdigmörge umdat 't 'krank' waor... Meh dat waor helaas ouch nog waarheid... Ózze Jim aan 't eind van de middig mer 'ns vertèld wat d'r allemaol aansjtaonde waor. Ech waor papa, waert geer Prins? Mama serieus: waert geer de Prinses? Hae vóng 't geweldig. Ilona houw gein keus, paar Ibuprofen en get Sjrobbeler d'r in en van de bank aafkómme. 's Aoves haet 't zich, same mèt ós familie in de ouw bie genèsteld en gewach tot 't moment dao waor. De griep waor weg door de adrenaline. Ich zelf sjting aan de bar, zoa wie ummer mèt Kiek Mer en Bekiek ut Mer. Ein leuk sjpel. "Sneaky" d'r tösje oet, umkleije en toen waor 't zoa wiet. Eine druim dae oetkömp. Es Prins en Prinses de Vastelaovend in ós sjoan dörpke veurop maoge gaon. 3 weurd: GE-WEL-DIG.

Die ièsjte waek waore de reacties zoa sjiek. Al daag luuj aan de deur mèt geweldige presentjes. Ós hoes geweldig sjiek verseerd. Zoa vääöl kaertjes gekrege en dan mós ós resepsie nog kómme! Veer laefde op ein road-gael-greune wolk.

Ein waek later kaom dae sjmale vrunteleke; einer der immer lacht! Jeugprins Tijn en zoa wie gezag zien Jeugprinses Noa! Ze woorte geproclameerd. Veer heije ós gein sjieker jeugprinsepaar kinne wunsje en dat gold ouch veur hun ouwersj en familie. Ummer d'r Neaver en Paul & Leo zónge d'r euver en Prinsepap Freek deeg 't: foto's make. Alles is vasgelag. Wie leuk is dat?

Mèt Jeugprinsepaar, meh ouch zónger hun zin veer waal 66 kièr op paad gewaes, in Hölsberg meh ouch dèks boete de dörpsgrenze. Nao recepties, zittinge, Brandbeer/Blauw Sjuut, jubileumfièste, LVK, auwt Wieverbal in Sjuèlder, ziekebezeuke, bejaardehoes, bie de zöstersj ein woosj gebrach, Knoevelemènt in 't Provinciehoes, op de basissjoal mèt de toekomst gefiès, Sjeleteleuverdrach in Sjömmert, kroegetochte door 't dörp. De Vastelaovesmis, wo veer d'r achter kaome dat Kapelaan Amal nog baeter plat kos kalle es Hollesj. De luuj van Hölsberg die noe in 'n verzörgingstehoes boete 't dörp wone, die begóste te huule van bliedsjap wie veer dao binne kaome. Alle zittinge en evenemente door de Beumerwalders georganiseerd, 't waor echwaor allemaol aeve sjiek.

De resepsie van ós 4 waor eine middig/aovend um noats te vergaete. Mèt d'n drumband Rochus en de fanfaar van Hölsberg veurop door 't dörp op de huifkar nao 't Gemeinsjapshoes. Wat d'r toen gebeurde..... Neet normaal, de ganse zaal..... Óngelukkig. Zoavääöl luuj die ós allemaol kaome felicitere. Wat ein weurd

zin dao gesjpraake. Mèt alle respect veur ekerein, meh de speech van President Richard van de Nachuule oet Nöt vergaete veer ech noats miè. Wat ein 11e, geweldig. (Alweer 't woord geweldig, jao ich kèn d'r ouch neet miè van make). De tied vloog um. Enigste wo veer aan mèrkde dat veer toch waal al ff in de riej sjtinge waore ózze veutjes, van ós alle veer, meh ouch van de Raod van 11 die in 't jubileumjaor in de riej d'r bie sjtaon en in hun midde de jubilarisse; Frank Souren 1x11 en Wiel Vankan 3x11. Wat een fiès en wat een cadeaus veur ós allemaol!!!

En dan dae optoch.... sjmörges nog de zaegel van baove en um ein oer, ouch gereigeld van dao baove, woort de knoep "zon aan" aangezat. Gebröld wie klein kènger, baove op dae Prinsenwage, zjweijend nao die 2, op dae angere Prinsewage. Veer wiste neet wat veer zooge. Zoaväöl sjieke einzelgängersj, groepe, vereniginge en wages die zich op ós get heije laote invalle. Dan veuls te dich ech Prinselijk. Ózze kelderbar "Keller Stad'l" hink vol mèt allenei leuke herinneringe die ós aangeboje zin, van dae optoch.

Truuk kómmend op die Verkes. "En die verkes dao, dat zin ós vrung". Vrung tot de allerlètste rung. Dae titel sjtamp van dit seizoen, meh de ideeë veur dit leed zin aafgeloupe jaor gebaore. Sjuus wie d'n Hauve Haan euveriges haha. Wat ich wou zègge.... wat Kiek Mer, Bekiek ut Mer en uiteraard Kiekeboe veur ós hóbbe gedaon is werkelijk mèt gein pen te besjrieve. Alles van ze gekrege, eueveral zin ze mèt heen gewaes. Nieks waor te vää. Um noats te vergaete! Jao jóng? Jao, ech waor!

En de Hölsbergse oppas-centrale, os ouwersj. Väöl is ózze junior mèt ós mèt gewaes, meh in de aovendoere heij Japie ouch twiè maond fiès. Want dat is 't, bie opa's en oma's is 't altied fiès.

Nao eine geweldige kingermiddig kaom de sjeeting ech kortbie. Meh aan alles kump een eind. 't Is sjoan gewaes, weurd dèk gezag, meh dat klopt auch. 't Waor ech sjoan gewaes, geweldig, fantastisch. Um noats te vergaete. Mochte de Beumerwalders in de toekoms geine kinne vinge, dan maoge ze ós altied belle. (Geintje natuurlijk... of neet?).

Mèt die Beumerwalders gaon ich de truukblik ouch aafsjele. Wat ein vereniging is dat! Dat kin zich geine veursjtèlle wat dees luuj allemaol doon ein gans jaor um de vastelaovend in sjtand te houte in Hölsberg, same mèt de Hölsbergse horeca uiteraard. Twiè maond langk, ekere daag d'r mèt bezig zin. Um Hölsberg good op de kaart te zètte in gans Zuid Limburg is werkelijk chapeau. Besjtuur, Raod van 11, Jeugraad, Tierraod en alle familie van dees luuj loupe zich de bein ónger 't lief oet um ekerein eine sjoane vastelaovend te bringe. Veer hóbbe erg vää respect veur dees luuj gekrege. Eueveral geit waal 'ns get mis, meh leef luuj: sjteun dees vereniging. Dit sjtökske cultureel erfgoed maog noats verlaore gaon.

Math Huijts zag ummer: "Liek mich te gek es veer dat neet sjpits kriege". Volgens ós is dat "sjpits kriege" good gelök aafgeloupe seizoen. Dank aan ekerein, zónger name te neume: jeugprinsepaar en families, ós femillie, ós vrung, vereniginge, de Hölsbergse horeca, alle Vastelaovesgroepe en natuurlijk alle Beumerwalders. Merci en de groete oet de fièstent!

Ouch namens mien ex-prinses Ilona,
Ex Prins Roger 3e.

Ps. Maog geer mich taegékómme in ein pekske van de Raod van 11: lach mich neet oet, 't is veur mich ouch nog vraem. 't Zit nog neet wie gegaote, meh dat is ouch lestig mèt dat figuur van mich.
Enfin, jao ich bin d'r bie. Heijs te nog tied euver dan? Same viere is ouch same de sjouwers d'r ónger zètte. D'r zin nog sjteke in de aanbieding :-). Sjoane Vastelaovend same. #Alaaf.